



Viadi cun il bastiment sin il Lai dals quatter chantuns.

FOTOS C. CADRUVI / ANR

Sin il Rütli – in'excursiun patriotica


Brunnen – Rütli – Seelisberg – Brunnen

DA CLAUDIA CADRUVI / ANR

■ **Varga 100 000 personas visitan mintg'onn il pustget a la riva dal Lai dad Uri. Era l'ANR ha fatg ina excursiun en la Svizra centrala.** Tge ruta prender? Via Lucerna cun il bastiment che dovra duas uras fin al Rütli? U via Brunnen cun la bartga che port'ins en diesch minutas d'ina riva a l'autra. I na fa betg bell'aura. Perquai èsi meglier da far curtas e da s'embargar a Brunnen.

Dessi Tell senza Schiller?

La bartga traversa il Lai dad Uri. In carpun tarment varga trenta meters sper la riva siadora. Igl è il Mythenstein. A chaschun dal tschientavel anniversari da Friedrich Schiller han ins nudà cun lettras d'aur sin il crap «Dem Sänger Tells, F. Schiller, Die Urkantone 1859». Dapi quel onn vegn il crap era numnà Schillerstein.



Il drama «Wilhelm Tell» han ins manà si l'emprima giada il 1804 a Weimar cura che l'Europa pativa sut las guerras da Napoleon e duvrava forsa gist in cumbattant per libertad. Tgi sa, sche Wilhelm Tell fiss era daventà senza agid da l'autur da la Germania il pli renumà erox nazional da la Svizra? I resta mo paucas minutas per far ponderaziuns, pertge la bartga sa ferma gia sut Rütli.

In toc prà nunspectacular

Mo paucas personas pelegrineschan da la senda siadora. Igl è russaivel. Nagin traffic d'autos. I savura da pastg e da gaud. Ins

dovra strusch tschintg minutas fin ch'ins arriva tar la prada. Ella è pitschna. Il pastg è segà. Intgins visitaders van cun respect enturn la prada e na ristgan l'emprim strusch da tschentar in pe sin il verd. Auters travesan il pustget senza reteniementschas e van direct vers il plaz d'engirament u tar la bandiera.

Quai fiss pia il Rütli. La tgina da la Svizra. Il simbol da libertad dal pajais. La legenda raquinta ch'ils trais confederads – sco represchentants dad Uri, Sviz e Sylvania – han engrà sin quest terren da tegnair ensem cunter ils engurds chastellans habsburgais. Ils istorichers dubitan. Ma la legenda è memia bella per laschar ir ella en emblidanza.

Ina visitadra passa duas giadas da la senda sper la prada si e giu e va a la tschertga vers la plazza da picnic. «È quai porpi tut?» dumonda ella ses um cura ch'ella turna. «Jau hai pensà che quai saja blier pli grond.»

Gea. Quai è tut. In pitschna prada verda. In lieu ideal per prender plaz, pusar, giudair la vista sin lai e culms, per ponderar e filosofar davart l'amur per l'agen pajais – u per far in picnic.

Il fatgs istorics

Tgi che giavischa da savair dapli, po visitar il «Rütli Memo». Il pitschen museum sa chatta en la chasa-lain gist sper la prada. En las quatter linguas naziunals vegn explitgà l'istorgia dal Rütli, l'istorgia da la confederaziun, tge che vala sco legenda e co che la forza simbolica è pli tard anc vegnida enfirmida entras il rapport dal Rütli che general Guison ha tegnì en quest lieu il 1940 cun tut ils uffiziers da l'armada svizra.

Ins dovra mo in quart d'ura per leger il text en il museum. I vegn empruvà da

far punt tranter svilup istoric e legenda patriotica. In citat dal istoricher *Werner Meyer* reconciliescha ils sentiments ambivalents: «L'istorgia na consista betg da tut quai ch'è succedi insacur, mabain da quai che mintga generaziun fa or da las restanzas accessiblas dal passà – cun descriver, interpretar, embellir, forsa schizunt cun mitologisar.»

Suenter la visita dal muesum èsi uras da prender in café en l'ustaria dal Rütli. Malgrà ch'i n'è betg bell'aura, hai tuttina hosps che gaudan ina tschavera sin la terrassa. En sasez savess ins uss turnar a chasa, ma davos l'ustaria maina ina via siadora vers Seelisberg. Il mussavia inditgescha in'ura viadi. Pertge betg far ina spassegiada?

Ensi a pe, engiu cun la denticulara

Il sulegl cuche gia mintgatant davos ils nivels ora. Plinensi ch'ins vegn e pli bella che la vista daventa – sin ils culms e sin il lai. Il Rütli vesa ora anc pli pitschen da si qua. Forsa èsi bun per in pajais sco la Svizra d'avair in simbol nazional uschè nunspectacular e mudest.

Ins va tgunsch sin la senda vers Seelisberg e sch'ins less exnum duvrass ins pli pauc ch'in ura. Si a Seelisberg vesan ins anc dapli dal Lai dals Quatter Chantuns.

Engiu èsi patgific. Ins sesa en la denticulara – quai vul dir Zahnradbahn – che va plaunsieu da la spunda tessaglia giu fin a la riva. Là spetga gia la bartga che maina ils turists anavos a Brunnen. Il viadi sur il lai sco finiziun da la spassegiada patriotica vegn remunerà cun intgins radis da sulegl che sautan sin las undas e procuran per ina atmosfera misteriosa, bunamain in zichel mistica.



Andi Schmid, il capitani da la bartga, n'ha nagut encunter da laschar fotografar.



Edy Truttmann, l'ustier dal Rütli.



Davos questa fanestra sa chatta il pitschen museum.



In schani spelà a l'ur da la senda vers Seelisberg.



Vista giu sin il Rütli e vers Altdorf a la fin dal lai.



La staziun da la denticulara si Seelisberg.



La famiglia Mahler dal chantun Son Gagl sin il plaz d'engirament.